


Deporte Local

Fraccion di POR ta felicita atletanan Arubano cu a participa den weganan Panamericano



ORANJESTAD (AAN) -Alan Howell, den nomber di Fraccion di POR a manda palabranan di felicitacion na tur atleta Arubiano cu a participa recientemente den e Weganan Panamericano. Un palabra di hopi pabien y tambe di gradicimento pa e gran logro pa Aruba a bay pa e hoben Mack Van Den Eerenbeemt kende a representa nos isla den saling y pa prome biaha den historia a logra un medaya pa nos isla den e weganan Panamericano. Igualmente a bay palabranan di pabien pa



Shanayah Howell, kende a logra e di 5 lugar den BMX Cycling y Feddison Flanders cu a yega semi final den BMX. Fraccion di POR ta hopi or-

guyoso di cada deportista cu a representa nos isla den e weganan Panamericano y ta gradici cada un di nan pa nan esfuerso haci pa por logra yega na e tipo di com-

petencianan deportivo aki. Alan Howell a bisa cu den Parlamento nan lo sigui lucha pa por logra e maximo sosten y ayudo pa nos deportistanan.

Shanayah Howell a keda na di 5 lugar den Weganan Panamericano

ORANJESTAD (AAN) -Un grupo grandi di atleta di Aruba a biaha pa Lima, Perú, pa competi den diferente tipo di deporte den Weganan Panamericano. Mester bisa cu e hoben atleta di BMX Shanayah Howell, manera el a bin ta haciendo desde chikito, a defende bandera di Aruba cu orguyo y amor. Esaki a sosode tambe na Lima, Peru, unda cu e net net e no a cay den e area di medaya. Shanayah a participa den diferente careda clasificatorio te ora cu el a pasa pa final, unda e speransa tabata grandi cu e lo por trece un medaya pa Aruba. Famia, amigonan y Aruba tabata pendiente pa resultado di e careda aki, sintiendo un orguyo grandi cu e mucha muhe aki a logra yega asina leu den un competencia asina grandi. Shanayah ta keda cu e holo di medaya brons y ta termina den un bon bataya na di 5 lugar. Su mayornan a papia cu Shanayah despues di e careda y el a expresa di ta super feliz cu su logro. Pabien Shany, trainer. Shanayah ta yiu di Parlamentario Alan Howell, kende hunto cu su esposa semper a encurasha nan yiu for di chikito pa practica su pasion cu ta caredanan di BMX.

